



Fegl d'infurmaziun

Stgaudaments mobilis al liber

("bulieus da stgaudar", radiaturs, radiaturs d'infracotschen e.u.v.)

Situaziun da partenza

Tenor las novas prescripziuns d'energia dal chantun Grischun (en vigur dapi il 1. da schaner 2011) èsi mo admess da duvrar stgaudaments mobilis al liber per intents commercials, sche l'emissiun da CO₂ chaschunada vegn cumpensada. Tar ils stgaudaments mobilis al liber tutgan en spezial ils uschenumnads "bulieus da stgaudar" sco er radiaturs e radiaturs d'infracotschen. Per cumprovar l'admissibladad da l'utilisaziun ston ils stgaudaments mobilis al liber esser munids d'ina u da pliras vignettas.

Cumpetenzza

Per emetter las vignettas èn cumpetentas las vischnancas.

Variantas per survegnir ina vignetta

Varianta 1 La gestiunaria u il gestiunari cumpra ina u pliras vignettas tar la vischnanca.

Varianta 2 La gestiunaria u il gestiunari retira gratuitamain ina vignetta tar la vischnanca, sch'ella u el

- mussa che l'emissiun da CO₂ che vegn chaschunada directamain u indirectamain d'in apparat che funcziuna cun gas u cun electricidad vegn cumprovadamain cumpensada d'ina organisaziun ch'è spezialisada per quai (p.ex. myclimate), ubain
- cumprova ch'il consum d'electricidad d'in apparat electric vegn cumpensà cun retrair electricidad ch'è vegnida producida cun energias regenerablas (attestaziun da l'ovra electrica).

Varianta 1

Il pretsch da la vignetta importa **60 francs**. Apparats fin e cun ina prestaziun da stgaudar maximala da 14 kilowatt (kW) ston vegnir munids cun ina vignetta per apparat. Sche la prestaziun da stgaudar maximala d'in apparat surpassa 14 kilowatt ston vegnir tatgadas si duas vignettas per in pretsch total da 120 francs (per ina prestaziun da stgaudar maximala sur 28 kW dovri trais vignettas per in pretsch total da 180 francs e.u.v.).

Varianta 2

En cas d'apparats che funcziunan cun gas u cun electricidad sto vegnir cumpensada 1 tonna CO₂ per onn e per apparat cun ina prestaziun da stgaudar maximala da fin e cun 14 kW. Sche la prestaziun da stgaudar maximala d'in apparat surpassa 14 kW ston vegnir cumpensadas 2 tonnas CO₂ (per ina prestaziun da stgaudar maximala sur 28 kW 3 tonnas CO₂ e.u.v.). Almain 20 pertschient da l'emissiun da CO₂ ston vegnir cumpensads en Svizra. En cas d'apparats electricis èsi er pussaivel da cumprovar ch'i vegnan retratgas mintga onn almain 4'500 uras da kilowatt (kWh) d'electricidad ch'è vegnida producida cun energias regenerablas, e quai per mintga apparat fin e cun ina prestaziun da stgaudar maximala da 14 kW (en cas d'apparats cun ina prestaziun da stgaudar maximala sur 14 kW ston vegnir retratgas 9'000 kWh d'electricidad producida cun energias regenerablas e.u.v.).

Las vischnancas ston surlaschar il retgav da la vendita da las vignettas ad in'organisaziun ch'è spezialisada per la cumpensaziun da CO₂.

Valaivladad da las vignettas

La vignetta vala mintgamai 1 onn (1. da settember fin 31 d'avust). L'obligaziun da cumprar ina vignetta exista a partir da l'emprima giada che l'apparat da stgandar mobil vegn mess en funcziun en la perioda da valaivladad respectiva.

Disposiziuns penalas

Sche l'obligaziun da cumprar ina vignetta na vegn betg observada, ha la vischnanca il dretg da prender sancziuns resp. d'incassar multas (art. 36 s. da la lescha d'energia dal chantun Grischun).

Versiun dal fanadur 2011